

ANG PAKIGBISOG SA MGA KASAG

Sa Ginghamarian sa Baykasag, gi-atubang sa mga lumulupyong kasag ug lambay ang usa ka dakong suliran.

Matag-adlaw nagkugi ang mga lumulupyong mga kasag sa ilang inadlaw-adlaw nga mga buluhaton. Samtang ang mga babaye gi-atiman ang ilang mga anak ug mga kinahanglanon sa pamilya, ang mga lalaking kasag nanrabaho ug nangita og ka panginabuhian.

Apan matag gabii, matukaw sila sa ilang pagkatulog tungod sa kalangas sa pagkuso-kuso sa mga balod.

Sa sinugdanan, wala lang panumbalinga sa mga kasag ang kasikas ug kalangas nga dala sa mga balod. Sa ilang pagkamaantuson, ilaha lang kining gi-agwanta. Matag-buntag sa ilang pagmata, gidala-dala lang sa mga kasag ang kakuwang sa ilang pahuway. Gipadayon sa mga kasag ang ilang inadlaw-adlaw nga mga kalihokan.

Matag adlaw nga mulabay, nabatyagan nila nga nag-anam anam sila og kaluya. Nagkanihit ang mga buluhaton nga ilang mahuman.

Usa ka adlaw, nabantayan ni Haring Lambayayong nga luya na kaayo ug hinay na molihok ang mga molupyo sa Baykasag. Mao nga iyang gipatawag ang mga molupyo sa iyang gingharian alang sa usa ka panagtigom ug pulong aron hisgotan ang suliran.

“Nabantayan ko nga nag-anam-anam mo ug kawalay gana sa pagpalambo sa atong komunidad. Unsa man ang hinungdan sa pagkaluya niining atong gingharian?”, kabalaka ni Haring Lambayayong.

“Wala na kami hustong pahuway, Haring Lambayayong. Nahasol mi sa kalangas sa mga pagkuso-kuso sa mga balod.”, sugilon sa kinamagwangang kasag sa Baykasag.


“Unsa man ang atong angayang buhaton para masulbad ning atong suliran?”, pulong pa sa hari.

“Angay na sigurong badhingon nato ang mga balod. Panahon na nga atong pakigbisogan ang mga pagkuso kuso niini.”, makusganong tubag sa mga katigulangang kasag.

Tuod man, nagkahiusa ang gingharian nga mangandam ang tanang lalaki nga makigbisog batok sa mga balod.

Sa ilang pagsulong sa mga balod, nasugatan nila ang mga pasayan.

“Asa man kamo padulong mga higalang mga kasag nga murag nagdali man kamo?”, katingala sa mga pasayan.



“Hunongon namo ang kalangas sa mga balod. Amo kiining sulngon para magmalinawon na ang among mga kagabhion ug dili na matukaw ang among pagkatulog.”, abtik nga pagtubag sa nag-unang kasag.

“Mahimo ba ninyo kaming tabangan sa among pakigbisog, mga higalang pasayan?”, hangyo ni Haring Lambayayong.

Nadala ang mga pasayan sa pangamuyo sa mga kasag. Naluoy sila sa kahimtang sa Baykasag, mao nga ningtabang ang mga pasayan.

Sa unahan, nakita na sa mga kasag nga padulong na ang mga makusganong mga balod.

“Mga kaubanan, ani-a na ang mga balod. Ipakita ta ang kalig-on sa gingharian sa Baykasag. Lupigon ta ang mga balod.”, pagpangisog ni Haring Lambayayong.

“Mga pasayan, unsa man ang inyong hinagiban nga gamiton pangontra sa mga balod?”, nabalakang nangutana ang mga kasag samtang niatubang sa mga pasayan.

“Ayaw kamo og kabalaka kay aduna kami mga ulo nga daw mga bangkaw nga kanunay nag-atubang sa unahan.”, tubag sa mga pasayan aamtang namudlat ang mga mata kay haduol na kaayo ang mga balod.

T-U-G-S-H!!!! Ang paglamba sa mga balod ngadto sa



kasag samtang nakadagan palayo ang mga pasayan.

T-U-G-S-H!!!!Ang pag-anod sa mga balod sa tanan niining maagian, apil na ang pagtakob niini sa mga kasag.

Bisan pa man sa kalig-on sa mga kasag, wala makaynigongan sa mga lalaking kasag ang pagkahawod sa pagkuso-kuso sa mga balod.

Natingala ang mga kababayhan sa mga kasag nga wala na nahibalik ang mga kalakin-an. Sa ilang kaguol, gipang-apas sa mga asawa ang ilang mga bana didto sa lawod. Apan, nasinati usab nila ang kabangis sa mga balod ug nangalunod silang tanan.

Ang mga pasayan ang nagpabiling mga saksi sa mga panghitabo. Gisuginlan sa mga nakakitang mga pasayan ang mga nahabiling mga kasag sa gingharian sa Baykasag.

Naguol ang mga batang kasag dihang nasayran ang nasinati sa ilang mga ginikanan.

"Hu!hu!hu!, Unsaon nalang nato kini", hilak sa mga gagmay nga kasag. Mao nga dali silang tanan pag-adto sa baybayon aron tawgon ang ilang mga ginikanan.

Mao nga hangtod karon, ang mga gagmay ug mga kabatan-unang mga kasag nalang ang nahabilin sa Baykasag. Sa matag panahon nga makasinati ang mga batang kasag og kamingaw sa ilang mga ginikanan, mosulay kini sila pag-apas sa lawod apan dili sila makapahilayo kay maanod man sila sa mga balod nga duol sa baybayon.

